

船山先生詩稿

自叙

蘇軾詩集卷之八

蘇軾詩集卷之八

境識生則患不得熟則患失之與其失之也  
寧不得此予所知而自懼者也五十以前不  
得者多矣五十以後未敢謂得一往每幾於  
失中間不無力爲槩括而槩括之難予自知  
之抑自畏之

詩言志又曰詩以道性情賦亦詩之一也人  
苟有志死生以之性亦自定情不能不因時  
變楚人之謂葉公子高一曰君胡胄一曰君

不肖云肖云不肖皆情之至者也葉公子  
高處此殆有難言者甲寅以還不期身遇之  
或謂子胡肖或謂子胡不肖皆愛我者誰知  
予情予且不能自言況望知者哉

此十年中別有柳岸吟欲遇一峯白沙定山  
於瀏連駘宕中學詩幾四十年自應舍旃以  
求適於柳風桐月則與馬班顏謝了不相應  
固其所已彼體自張子壽感遇開之先朱文  
公遂大振金玉竊謂使彭澤能早知此當不

僅爲彭澤矣阮步兵髣髴此意而自狀別爲  
酒人故和阮和陶各如其量止於阮陶之邊  
際不能欺也

庚申上巳湘西艸堂記



船山先生詩稿

傳集

湘西王夫之而農父著

男敵輯

五十自定稿

四言詩

和陶停雲贈芋巖五十初度

乙巳

蒸蒸良稼滌滌靈雨滋胥以榮炎威莫阻君  
子不遐如琴在撫無念古人空爾延佇

道延今者爰始鴻濛靡明靡日靡流靡江如

彼暗室召暉于牕匪君子任其孰能從  
有梅有梅霜裏共榮人恤爾寒爾怡予情不  
愆日邁不負月征維仁引年以保爾生  
喬喬豫章執彼斧柯匪不日勞許許維和天  
期不假物望實多邁生知化日益云何

雜詩 丁未

清夕始澄孤月出林繁陰繹繹今我乍歆昔  
者驅車適彼四野求我友生贈以瑤竿昔者  
乘舟順彼中流解我衝牙以贈同仇迢迢南

山崔崔峻巖暮雲羣飛谷風瀉湍陽鴈差池  
矧彼鷹鷂余生不再余命不雙短衿自寒朔  
風搖釭歲莫薇枯飢誰與同

樂府

長歌行 已丑

樽桑無落景瑤水無逝波千歲有問津微生  
遂經過偶零玉露漿聊弄素女娥不知人間  
秋落葉紛已多進酒白玉觴侑之緩聲歌長  
旦無疑雲畢景皆頽霞俯睨星火流停歡待  
伊何

獨漈篇

獨漈濁水汀水濁菱葉青不畏濁水寒但畏



濁水腥水腥魚亂鰕蟹相半風起月黃菱葉  
苦絆東家孤兒西家婦夜聞啼聲旦拍手賣  
刀舊結并州豪春風日醉新豐酒耐可死濁  
水中不能宿秋草陌揮刀難割空中烟長歎  
流光坐間擲

君子有所思行 乙未

天道不可見往來孰令親求仁信繇已循我  
得其真宿糧陟穹谷問彼度世人浮屠束入  
漢老明西去秦驚神離寶命歟景攀輕塵屈

理遂所歎淫曼增迷淪孟軻喪齊梁辯言隱  
千春堅壘拒輪攻墨守固重圍傾筐貴所寘  
室遠願不伸夜聞曷旦急秋驚絡緯新時哉  
隨逝水枉渚暇逡巡

枯魚過河達

戊戌

籠中鴨聲吧吧水中鴨游濺濺謂水中鴨何  
妨分我以餘涇越主嘗吳嫂宮中皆含藏漢  
有張良楚項伯涇清渭濁皆吞吸鳳凰餐竹  
花桑扈喙場糝嗟爾嗟嗟今何及君不見枯

魚過河汰胡不早游濁水學鱖鮪

來日大難

王寅

來日大難毛凋羽殘不知今者誰爲妙顏醉  
酒肥牛何用解憂憊人王喬足可遨遊黃金  
可作塵世可度歟游濁水龍上天角沒命黃  
泉志存僊佺遺物獨往杳若孤烟軒轅乘龍  
鬚髯雲中天老操轡鬚髯雲內精魂相存生  
死同門千秋萬歲樂以忘言

長相思二首

長相思永別離愁眉鏡覺心誰知蛛網閑西  
密鴉笙隔院吹年華詎足惜腸斷受恩時  
長相思永離別地坼天垂清淚竭汕卜罷春  
燈寒砧謝秋節寶帶裂同心他生就君結

箏篴引 丁未

彈箏篴擊鼙鼓款留君君不住素絲玉壺白  
水清傳山蘭膏飛烟輕華月微風吹鳳笙他  
人不語君含情胡爲乎凌狂波而亂流從君  
不果心繁憂東海之魚不可得西飛之鳥不

可留往者不諫來者徒傷寸心炯炯明月光  
千里萬里隨君傷君凌濁水不見影青天高  
懸獨徬徨

五言古詩

分界嶺

行役杳窮極愁心積紛詭薄暮晚靄宿晨望  
罪微起蜃氣迎山雲蒼流奔海水桂關信天  
樞南條遷物理揮手謝寒烟回頭訝楓紫溟  
遊漸窮髮行歌聊匪兇勾漏引丹砂云何駐  
芳紀

晨發端州與同鄉人別

己丑

海甸見新草故園入春心天涯共萋萋誰能

辨淺深寒湖落沙影曉塢鬱曾陰日南絕征  
鴈桂水孤歸禽遙分前渚淚共溼故人襟

蒼梧舟中望繫龍洲

暮雲籠山碧綠樹沈流影中江瀑珠分孤嶼  
畫簷整團團紫茸合森蕭翠光冷秀挺旣歆  
別高涵亦危秉煙浦極遠天柵香吹隔嶺凌  
晨源雨漿卽目飽幽境萬古蒼梧愁因茲慰  
孤耿

初入府江

粵草易春深駛流知潮遠樵人垂野雲灘花  
媚絕嚙林于委岸陰木綿俯幕偃江介愛棲  
回芳菲惜遲晚昔來取慰莊吾窮良悼阮生  
事有幽棲天遊恣冥返

佛山

昔聞滄波興挂席獎微嚮荔棹戒晨征葑田  
果迎望山盡時遠飄川分故微漾星河搖碧  
綴天氣覆青蕩寄身良已孤行吟空自壯萬  
端散紛詭吾道有興喪無取笑支離徒滋冒



王昌齡  
二  
禽尚繁慮本物先冥歎輟興像遲爾海鴻飛  
明珠懷佳貺

雜詩四首

結璘耀東方搖輝散庭圯褰帷視玉衡何爲  
倏東指汎愛惜流光含情撫逝水踴鳩天涯  
鳴繁英怨游子東園積落芳安問桃與李悲  
歌無與聽拊琴復中止

孤雲起江漢搖影自徘徊飄風不相待吹落  
陽雲臺膚寸旣違陰炎威已復開清音闕廣

野蠻歌誰爲來欲因廣成子返此元息胎時  
哉不易遇摧折使心哀

昔我遊漢水遙與神女期琅玕非所歡玉珮  
空相貽願託雙鳳鳥當時聽者誰不惜薜蘿  
死將爲蔓草欺溝水自東下繁星已西馳幽  
谷返椒裳琴心終自知

悲風動中夜邊馬嘶且驚壯士匣中刀猶作  
風雨鳴飛將不見期蕭條阻北征關河空杳  
靄烟草轉縱橫披衣視良夜河漢已西傾國

園今未釋何用慰平生

胡安人挽詩

序

小司馬彭然石彥徵其元配胡安人殉  
節詩余方移疾待罪不敢居風雅之列  
已蒙恩得放唐宮詹誠以次金黃門堡  
韻七言四章俾余屬和余別爲五言擬  
神絃之曲安人沈玉黔陽司馬從王嶺  
外妥清靈招義魄抑必有滾情將之李  
翁臨叩道士之事抑非貞魂所憇聞楚

有二招用以慰裂隕返幽素連類而紹  
之末亦可乎

幽蘭自著花菖蒲自成節激流難久生谿風  
易吹折夙昔蘭閨英金歿送遠道歷歷視明  
星悠悠思春草春草生有時黃塵飛不已白  
玉怨蒙沙清流怨何駛上有龍標月下有沅  
江水沅水自東流梧雲向南開蒲花生石上  
芳節待歸來

晨發昭平縣飛雨過驢脊峽上泊甌灘

會月上有作

孤遊息魂營涼泛叶形美清晨理桂檝薄言  
遵遠水遂欣斯望協遺彼羣衆詭微雨前峯  
來晴光錯表裡脊颯散飛雪婉約弄明綺下  
倚驚瀨鳴俄開新翠起雲倦偶失羣雷殷歎  
何止金光界波流大火循西指飛舄歸有期  
勞柅聊夕艤歷憶衆峯外延秀紛可紀人籟  
偶旁託眞賞歸太始

遊子怨哭劉母

辛卯

北風吹凝雲遊子行不息易挽遊子車難駐  
桑榆色車輪遽已遠流光太相逼遊子豈不  
知遐心蕩憑軾

憑軾日以遠流光日以晚夜望曷旦鳴夕待  
牛羊返寒風動明燭疑見遊子飯夜夢續晨  
愁九秋成偃蹇

偃蹇不相期遲暮豈自持昔爲倚閭歎今爲  
絕命思詎怨遊子去翻憐遊子悲耿耿孤鳥  
鳴颺颺垂風絲

絲斷不復理，鳥鳴哀難止。三年九春絕衰草，  
凌霜靡行行向隧。道邑邑歌蒿里，拚涕會有  
時。蒼天終何已。

小霽過楓水嶺，至白雲菴。雨作觀劉子  
叅新亭紋石，留五宿。劉云：亭下石門石  
座，似端州醉石，遂有次作。

松級偶晨登樾館，聊夕止。輕裾挾餘滋，溪烟  
宛方起。夫君碧雲期，良會佇難委。凌霄豈有  
捫步秀，方可紀流耳。延雨聲驚華粲石，理架

閑馭微霄初英散新紫雲觀權衆木神樓聳  
弱水僊遊亦在區魏樹空云綺淹宿有餘清  
實歸載留喜

三歲度嶺行薄言觀世樞壯心銷流丸林泉  
聊據梧歸心存醉石取似在枌榆江湖憂已  
亟神尻夢方趨漆吏稱昔至周臣懷舊都流  
止互相笑外身理不殊委形憑大化中素故  
不渝興感既有合觸遇孰爲拘海塵無定變  
聊崇芳蘭軀



春日書情 乙未

春雲覆千里飛雨來微霄良陰不待旦宿昔  
非崇朝蘅臯英猶緩蕙圃芳未遙連卷仍故  
鶻勇被麗新條佳人阻采若含情虛握椒行  
邁匪康塗中心寫長謠

西莊源所居後嶺前窺古木清沼凝陰  
返嘆念居此三載行將舍去因賦一詩  
丁酉

物遇日屢遷流止暫不遺浮雲出丹巘游鯨

遵緣漪心知旣無滯軀質匪有期俯仰同久  
乍令我奄宅茲修竹叢尙稚岡桐蔭每移雲  
岫半明滅霞嶂時參差坐聞春鳥鳴亦睹秋  
葉離凌晨延圓暉迎寒卻涼颺回首舜帝峯  
濯足春水滑芳草良未歇佳期行可規行道  
昔已靡槁木今何居俄頃已藉用乘乘將焉  
之

冬遇

太華蛻竒骨黃河閼靈軀風雨恣所狎金石

等不渝堅脆各叛紀正襟守中樞觀閔嬰陸  
沈隕問戒斯須吾生匪蜃雉物狀漫紫朱聊  
息朱鳥麓夢無金簡書延彼堪輿情充茲營  
魄虛晶宇滌宿雲回風蕩椒隅薄嵐開夕暉  
寒英媚霜趺佳期無定軫元化隨與俱悅心  
道已廣栖貞鄰豈孤三壽同修促二見息肥  
癯

山居雜體卦名

己亥

豫子殉其道井生貴所希坎流邈殊塗旣濟

愉同歸比肩通異理蒙袂輕調飢蹇余初秋  
蘭升高舉野薇剝芋充晨餐畜荷資霜衣離  
離劈椒房鼎鼎閉松扉履石探晴雲臨崖歛  
夕暉益知榮公樂漸看卜子肥願生喻明臆  
觀物避炎威隨茲寒暑謝遮迹與無違

來時路

悼亡

辛丑

來時若大難寒雨飛瀼瀼今者復何日秋原  
稍葉黃遵路行以悲飄風吹我裳流目心自  
喻劇結車輪腸

人生苦經歷精爽定往還  
踟躕行俟之輕煙  
靄容顏飛鳥過我前  
流泉鳴其間欲語不得  
接浮雲云何攀

迢迢荒原路曲曲粵楚甸  
匪羊亦匪牛窮日  
歷郊菁櫟苦梅復酸宛  
轉迷所綖凜矣秋霜  
心哀哉白日變

此先君子輓先妣鄭孺人之詩  
孺人襄陽人  
外父文學公諱儀珂字履聲  
宗伯公鳴峴先生諱繼之之從孫  
外祖母高氏上林

令加光祿公諱達女外父隨高公宦嶺南  
而先君從王桂林抗疏棄職庚寅秋娶孺  
人爲繼室是冬隨先君隱楚道聞祖母譚  
太君逝哀慟屢絕流離中營大事畢徙常  
寧峒山丙申生敬于西庄源丁酉復遷于  
南嶽庚子徙茱萸塘辛丑六月棄世時敬  
方六歲近體中嶽峯悼亡詩及絕句中初  
度口占詩皆先子是歲先後作也孺人通  
文詞而不拈筆墨體孱弱而躬親釜臼拈

遷與先子以節義共矢棲遲與先子以薇蕨共甘當捐幃之日唯以前母所遺之兩兄爲念而不及黃口之藐敵也塋高節里大羅山後先子逝遺命並阡其自銘曰有明遺臣行人王某字而農塋于此其左則襄陽鄭氏之所祔也嗚呼蒿蔚虛生不能揚慈恩之萬一存先子一言于片石與與十字碑共傳不朽耳恐本末湮沒因附識于此 不孝男敬識

感遇 甲辰

海國有嘉卉，紹古蘭蕙名。迢遞致遠道，綺靡  
發檐楹。悅彼情所合，矜茲芳有成。稷下寵琴  
客，梁園誇詞英。物玩已亦勞，枝葉非天榮。  
迢迢黃姑星，臨河發光耀。織女揚熒微，脈脈  
如相炤。被以纏綿情，指彼佳期妙。高居無通  
理，下士紛疑料。鑒貌以測真，忤然貽姍笑。  
湛湛北辰表，沆瀣充寒門。安知光影微，不有  
衆星繁。言窮至彌寡，心絕理已諼。容成置象



外義和輟紛論大地有疆畛羣生各本根甫  
田空惻怛念茲息神魂

韶月知爲春百卉欣及時精英取不息掠美  
悅其姿元化遺糟粕析合無遲疑芳華及零  
落悲愉各在茲商山有高歌燁燁三英芝

漢南嬋媛子臨岐憂清露羅襪惜已微中心  
良有故美人去我遙思之若晨暮枕簟有餘  
清肅肅警宵寤

飛虫弭清晝熠熠流暗空炫影從彼異匿光

背所同胡不懷應求殊德樂爲政愜然念吾  
生晶宇共昭融捐情不矜己雲日相雍容嗟  
哉猖狂子何爲悲道窮

綿綰西塘柳垂絲蕩春色天情亦容曳元化  
無帽亟駘宕不損貞蕭森非尙力昭質豈枯  
槁樂天消偏側遲遲春日心悠然庶相識  
浮雲起岱陰蕭屑積空微翕合非一氣靈雨  
千里飛如何彼姝子孤愛俄頃輝光影或相  
報寸心先已違岐路勿相問行行各是非

涉維想宓妃游楚夢高唐宮中多嬋媛棄置  
如遺忘豈其濁河流獨有鯉與魴芸堂足燕  
寢蘭閣有芳香歸來歡日夕至樂方未央

阪月漾初暄桃李恥未開旣欣新緒榮亦畏  
霜雪摧遲疑志不決東風徒增哀兩者誰爲  
佳旁人難與裁靜女遠逢迎置彼良願乖巫  
咸已上天鵲易非吾媒歡怨物自勞於我何  
嫌猜

清風起蘋末吹蕩蘭與芷迨其明滅間歎然

迷端委相望不相見幽動無能紀萬歲亦匪  
他今者爲我始條緒昔芬芳勿爲歎逝水

夏日端居 乙巳

岫雲無本始飄風善因依暑坐一以望空明  
兩不違白日舒中陸綠草澹鮮輝游蝶池陰  
飛雙鳥雲際歸目泊欣有合炎情中已微

雲山妙峯菴云是申泰芝煉丹處

松陰合綠霧木末飛空光幽囑旣云密遙情  
歛已長首夏積翠鮮亭午條風涼煙容澄岳

壑水氣辨蒸湘圓宇目所鏡孤立心未央寓  
形俄邂逅僊遊昔回翔測彼鸞鶴情引茲丘  
海望羽蛻固有待仁樂詎無方懷炎登大庭  
悲夏陟首惕繕性良有藉終生胡弭忘

秋陰

丙午

徂夏氣未澄滌暑期久誤西爽歟浮雲落暉  
難再駐輕霄泊霏微星影見回互踈雨潤晨  
光餘靄亘日暮冷吹不更惜昭融逝何遽驚  
茲四序改遷此百年遇天物無宿留吾生閱

已屢藏丹壑誰在流丸跡匪故大力非我知  
甌吏亦何措但此欣蕭清遲回愜幽素

歐子直自南嶽返訊之

靈壑有冬榮幽人時晏出天物無孤清閑情  
自相匹徘徊度飛鳥乘凌俯落日虛曠漸不  
窮丹碧絢非一夕宿抱餘爽名言紛欲悉豈  
無濠上情言耽雙徑逸神晤遺形區於焉託  
良暱

古意 丁未

堂堂背春日悠悠送落英春日無返暄落英  
無固情遙知當決絕中心澹不驚濟水穿河  
梁河水無爲清女蘿繁枯枝纏綿待新榮榮  
謝意亦盡移言怨婦貞

問芋巖疾

二仲浴清肌三五養妙嬰相顧雲已歛待朞  
月將盈化碧旣乖期佇鶴方含情憚龍誠就  
轡画虎何足烹裊煙自離合泛舟無迴縈念  
彼非心競釋茲若羽輕黃芽抽別類金藥有

冬榮元笈君已授勿爲吝玉笙



歌行

休洗紅 已丑

休洗紅洗多顏色壞東園桃李花陽春不相  
待去時羅衣薄來時羅衣寒天風日暮忽舉  
袖君自看鳴蜩札札落柳枝深閨年少猶不  
知

莫種樹戲代山陰相公贈懷寧朱侍御  
莫種樹樹長青扶疎竭來九子鳳故是白門  
鳥白門鳥柏臺鳥欲啼不啼天未曉街鼓聲

彗星欲稀還向羽林門外飛

康州謫追哭督府義興相公是去秋同  
鄒管二中舍會公地

可憐康州城瀧水從南來龍旗翩翩去何處  
蒼梧迷密雲不開秋風起秋葉飛旗翩翩去  
不歸烏頭黑雀頭白城上飛聲啞啞羽林軍  
神廡馬昨日靈羊溪今日康江下楊花自飛  
烏自栖相公白旄清潯西康州城下生蒺藜  
蘄蕨行

清晨上南坂蕪草深沒腰黃雲冒山起雪子  
零亂飄雪子穿櫻笑雪花漫櫻衣飄衣溼尙  
可懸愁空筐歸土皮滑白斷斷柄短莖泥重  
淘寒井黃茅蓋頭雪侵領奮椎力盡剛過頸  
綿綿咽咽聲可憐阿兒涕墮牽絲餅流泉渾  
渾濁如藍朦朧猶見伶仃影伶仃相扶過眼  
前黃綿襖子雀兒毬夢裡春光快活天君不  
見馬槽  
東去雪花洒血痕丹鮮

山居雜體兩頭織織

兩頭纖纖冰溜絕半白半黑燒嶺雪  
扁扁膊膊凍竹折磊磊落落飛霰屑

山居雜體五雜俎

五雜俎采野藪往復還洛溪谷不獲已黃農  
伏

哭內弟鄭忝生

悠悠重悠悠送子岡隴頭乍可爲陌上之秋  
草繁霜一夕同荒丘不能爲磷磷之白石相  
看逝水旋東流與君別何所庭肯綠竹下日

夕君不來春雲覆平野與君期何日三五輪  
魄充君歸黃泉去月輪故未空君家舊住鹿  
門溪君魂欲歸道路迷與君相逢八桂城鐵  
騎斥野飛箭鳴舊愁疑在春夢驚乃知君死  
而余生生亦不可期死亦不可悲鷄鳴月落  
杉橋路且與須臾哭別離

管大兄挽歌二首序

甲辰

有明文學管嗣箕弓伯以今癸卯冬卒  
于南岳百丈山病乃使余有宿草而不

得哭其明年姬人以亡託將改適返靈  
筵於高節里之故居乃申一慟良既然  
矣將復何言抑夫生人之役榮凋歡惡  
減有二三唯一而不兩者死而已唯一  
而不兩故昧者遲回覺者引決但一忍  
之須臾無他畏難矣慷慨之捐唯一斯  
易假令試之二三則壯士之頻繁不能  
魯縞之穿也今勿說兄之死得年五十  
有二考終于室兄固人不期此癸未賊

投人於湘水鴈行相接兄犯其不測以  
保難弟之節一死矣戊子起兵不利縲  
而繫於潭獄刻日就白刃者一死矣庚  
寅流離困病於嶺海犯難以護難弟於  
長林一死矣以身突其三死而誰期爲  
一者之考終兄弄死如丸死去兄如驚  
復得此十三年於荒山櫛徑之中兄餘  
食而贅形視之昔不爲兄賊而今爲兄  
哀耶妄也兄磊磊不爲愿人之容人或

以爲兄詎此何有哉兄善飲亦善飲人  
兄善以財假人然以二者故引其豁豁  
之澁而終不能充塞之兄不慕炎而棄  
寒以是脾睨炎者而雖不炎者亦妒兄  
之不與已同調以歆歆于炎塗詎之興  
自此積矣雖朕彼流者且斃腥草唆腐  
萍寶敵帚如拱壁而嘯囁於寒雲酸雨  
之中浸不詎兄則兄病矣兄家世宣州  
寓籍蒸上族寡而未有血胤則或有爲



兄惜者夫萬彙之息形生爲下神傳爲  
上今兄以其孝友義烈之氣如雲如日  
其暉蔭所注且將孕爲千百奇男子以  
似續古人彼區區保有其血肉之產响  
响噢噢衛之如君愛之如父此一藉之  
絲其聯能幾哉故凡此者不足以哀不  
足以哀則亡用其挽聊紹古薤露蒿里  
各一章以娛兄于漠漠焉耳

薤上露光油油日出曈曈其光易收樂日之

匿得久留將何奉奉咿嚶室有婦膝有兒兒  
爲父婦爲師夔夔終日夕鷄鳴晨起以奉之  
婦步亦步婦趨亦趨偃偃僂僂爲兒覓肥腴  
如何令死心肝摧姝姝媚媚眉不得開將此  
悲君胡當哉日已匿陰已羶軼雲霓足徘徊  
露晞朝陽樂無涯

蒿里誰家地不在蒸江上不在湘潭城不在  
蒼梧黃茅瘴祝融爲蓋白石爲輿安安緩緩  
駕輜車挽人勿誼聽我唱言魂歸湛湛之青

天形返草草之墓田鼓毋怒笛毋悲庸夫不  
罵鬼世間何用庸夫爲以忝笑罵代痛哭鴟  
鵂乾鵲齊上屋主入弃屋返青山庸夫他家  
覓酒肉我有酒不酌黃泉將潤庸夫口肥牛  
十嚮醇醪三斗輓輓軸軸狂鼓庸夫死奔走  
黃泉之人應拍手

避暑王愷六山莊會夕雨放歌

乙巳

楊梅寨前楊梅熟草覆溪流遶南麓雷聲昨  
夜破疎星片片餘雲留岳足雲留雲去爭新

晴蕉葉回風綠倒傾吹燈相照兩含情良宵  
不負新涼生我不能飲君不歌華月出雲光  
奈何電漾金液雷顛牖浮雲上頭懸北斗放  
棹唯尋杜景賢倚藤長愛支離叟就君銷夏  
借君閑無歸之客身闌珊稻脚將圓子魚長  
高枕無心謀往還

夢翁補山堂詩和者數十人今春始枉  
寄用韻奉和並數翁體

當其爲人不知虎何妨疑虎能生羽羅剎刀

兵諸天花此土強名之爲兩山非山湖非湖  
無絃之琴知音孤憑空歎架飛樓瓊島八千  
仞東海之西疑有無肅慎之矢其長咫尺公孫  
見鷄有三耳清波不犯自垂綸何但胸中五  
嶽起東藏鄆謹龜陰之山西虞芮倒影晶天  
無表裡有虞之媚吮毫腐九疑雲蘿十疑補  
非公拄杖劃破蒼梧煙下士癡將修眉黛莖  
數我不出門登公堂公勿謂我精神荒別峯  
凝紫島道碧從門入者徒徬徨

五言近體

月斜 戊子

月斜空碧合河漢幾時生  
杳靄嶽蓮出蕭條  
露葉橫歸雲飛帶雨涼  
鴈過留聲祇訝西峯  
上清宵有奏笙

永興廖鄧二君邀宿石角山僧閣是侍  
先君及仲兄堅齋遊處

十月寒潭收二年客艇過  
画欄星影近  
鰲草  
夜霜多急難迷原隔飄零  
廢蓼莪  
郴江無限

水不與挽流波

清遠城下憶湖湘舊泊

乍放滇江峽疑連青草湖星河搖古岸漁火  
歷蔣菰霜後迷南鴈日斜憶廟烏佳人多楚  
塞誰解贈明珠

春江古體

己丑

春鳥弄芳洲初英照碧流晴雲捲山入曉露  
炫煙浮昨日賓鴻北來時木葉秋湘江連桂  
嶺瑤草起新愁

南中霜降

北候懷青女南飈拂白蘋  
墟烟深漠漠江草故鱗鱗  
翠袖寒猶薄黃華淚已新  
炎洲無限橘誰與寄湘津

不寐

庚寅

夜火榜人驚江沙依舸平  
落花逢昨日潮月應初生  
芳草空凝望綠雲詎有情  
含樓愁夢杏魚析警嚴城

劉端星學士昭州初度時初出詔獄



昭州遷謫地清冽道鄉泉過嶺金風緩當秋  
暑日懸重閣初度酒莫誦四愁篇蕭艾吾何  
有靈椿正大年

落日遣愁

落日羣峯外青空邀晚紅晴山添雪色遠樹  
緩霜鴻心放閑愁後生憑大化中天年聊物  
理楚國想遺風

癸巳元日左素公鄒大系期同劉子參  
過白雲菴茶話二首

癸巳

晴鳥曙山天林光捲宿煙  
銛陰藏雪潤麥露  
泣珠圓江樹南開早唐松  
東向偏殷勤懸有  
待請組舊行邊

昨夜梅邊約春情悄不禁  
刀環光陣陣佛火  
照心心箕頽徐生拙江湖  
魏子深南陽憑羽  
翼恩澤放山林

春盡三首

高樹鶯飛盡流聲能幾聞  
微晴通雨色深綠  
過花熏病淺心心在歡遇  
曲曲分定知雙鬢

謝無復惜殷勤

雜句與芳洲當時不可留  
還持流景謝長遺  
故心愁雲際仍行藥東臯  
倦理疇滔滔屬孟  
夏騷怨寄靈修

止竟春須去灰心攪鬢絲  
薄晴長景困餘冷  
晚風欺啼鳩猶爭序藏鴟  
已後期寄芳終契  
濶陰綠聽繁枝

哭李一超

甲午

鵬鳩春先逝龍蛇關未開  
容頭餘子在七首

酒人哉白髮搖風木丹心亘夜臺報恩無竟  
日留取劫前灰

再哭季林兼追悼小勇匡社舊遊

古寺青溪路東牕隔一峯綠花忘柳徑驅酒  
試蘋風墨冷襪材客巾殘墊角雄餘生悲夢  
賦不與勒新宮

晦日二首 乙未

春色去堂堂清和損歲芳夕煙青帶遠晴樹  
綠浮光秣稻江鄉雨琅玕竹逕香定情裁古

怨遲晚意偏長

白日奈朱顏流光幾暫閑  
九春餘此夕落照已前山  
紅豆留誰折落花去不還  
逢迎他日恨舊上鬢絲間

夏夜

裊露青林合微涼生未央  
太清平野濶薄霧遠山長  
南樹驚身鵲雙星憶鳳凰  
風吹來何處笛急調欲清商

重登雙髻峯

丙申

拾級千尋上登臨一倍難日斜雙樹徑雲滿  
曼花壇龍雨腥還合佛燈青欲殘振衣情不  
愜北望暮雲寒

二賢祠重讀義興相公詩感賦

謝傳青山志羊曇舊見招千秋餘版槩孤榭  
託雲霄弦望何時合杜蘅今已凋清潯二十  
里遺恨在軍謠

公于蒼梧以軍謠  
十首授余梓行

花詠八首

丁酉

櫻桃

豔深消雪冷行客迎春酣弱蒂東風試繁枝  
細雨堪大官誰復薦啼鳥定先含獻歲搖新  
恨羣芳且未諧

迎春

玉峯疑茜茜絳珮詎辛夷蝶醒初春裡香筭  
未綻時雲生僊袂重月上素痕滋願結青蘿  
好亭亭寄遠思

山礬

韶月飛金粟春雲降瑞霽曉風別有約芳草

共含情鬚淺密尋蝶香過恰趁鶯僊  
暮卽此玉爲京

紫荆

珍第偕金枕同歡感異株虞淵衣未浣漢翼  
泥應濡疎幹捎鶯羽繁英礙蝶鬚桃蹊別弄  
色泣露泣邢妹

杜鵑

縹緲輕紅藥丹痕競若榴僊歸十里幄雲指  
九重樓晴霧籠深暈平塘炫碧流如何蜀鳥



恨夜月未消愁

黃杜鵬

啼鳥愁如歇閑情寄淺細睂新欲試喜額曉  
待添粧酒色酩酊背春情駐柳香愁心迷望  
帝聊學赭袍黃

金釵股

金虎胎含素黃銀瑞出雲參差隨意染深淺  
一香薰鬢霧畝難整煙鬟翠不分無慙高士  
韻賴有暗香聞

岡桐

樾館辭寒候江鄉記稻春笑迎朝日上繁暎  
晚霞勻紫沁侵鉛粉青趺藉綠茵似憐芳草  
弱飛覆玉鱗鱗

卽事

秋晚翠娟娟寒條細雨邊斷雲藏半樹歸鳥  
沒孤煙篠弱梢梢重藤輕葉葉便上方夕磬  
早亭午落清喧

山居雜體藥名

巳亥

白日及閑年尋常山色妍古松香滿徑修竹  
葉參天紫蕊朝霞雨黃連夕炤煙柴桑寄生  
理不受督郵憐

山居雜體縣名

月上林間夜煙含山際秋蛩吹傳靜樂旃馬  
足僊遊抱甕安園藪忘機定海鷗餘生隨大  
冶漚沫委東流

嶽峯悼亡四首

辛丑

不愁雲步滑慊慊故傭來多病霜風路餘生

隔歲回鳳梢殘染淚蛛網誓封苔舊是銷魂  
地重尋有劫灰

到來猶自喜髣髴近檐除小圃忙挑菜閑牕  
笑讀書忽驚身尚在莫是客凌虛楚些吾能  
唱魂兮其媵余

關塞天涯黑精魂一倍丹停雲迷鳥宿舞雪  
耐梅寒不遣琴心寂相憐劒影殘三年烹白  
石餘瀟咽龍喘

岳阡初發罷君此拜姑章地下客能聚人間

別已長。蝶飛三月雨。楓落一林霜。他日還淒  
絕。余魂半渺茫。

迎秋八首 壬寅

昨夜月初明。青楓引露清。稻香三日雨。虹影  
一溪晴。落照低猶赤。蘋風晚更輕。定情凡幾  
日。銀漢暎階平。

斜日颭垂楊。因風欲上黃。侵苔依淺碧。漏月  
點微涼。去鷺驚溪改。跳魚拂荇香。森森蘆葉  
滿。幸緩一頭霜。

長日倦何曾。砧杵早不勝楊枝。愁少府杜若。  
老吳興。星影微侵幌。螢光幾背燈。西風纔一  
夕。先與客愁應。

舊不解驚秋。於今預理愁。雄風三楚國。殘月  
四更樓。天外芙蓉劒。人間竹葉舟。涼宵聊邂逅。  
迥不似夢中遊。

青山秋緩緩。白髮髯匆匆。賦筆期霜鴈。琴心  
款夜桐。藕絲侵水碧。魚眼汰波紅。蓮唱歌季  
少。江南一夢中。

當暑病猶輕，離魂幾日陰。  
羽笙天上曲，溝水路傍吟。  
渡鵲無聊事，歸禽有限心。  
炎光勞綆，綆回首怨寒砧。

投分留紈扇，懷恩記葛衣。  
興亡憑一淚，去住恨雙違。  
戲蝶情還在，元禽巷已非。  
貯愁晴齔，館舊已遺莎肥。

吳蘭初成練，商聲畏上絃。  
到來拚落葉，先事怪鳴蟬。  
暗溼三更露，公收萬里煙。  
亭亭蒼壁外，雲岫弄餘妍。

寒月 甲辰

寒光清不極一半上東峯霜淨初弦小煙平  
素影重江山羣動息河漢九霄封迴絕宵鍾  
後吾生定幾逢

早春三首 丙午

光氣浮莎徑紅滋點藥畦晴絲弱柳外夕蝶  
小窻西風細千波綠雲生一片低天情隨物  
理色色與春齊

不覺放心移年華冉冉知晴窻熏午睡暄步



愛芳吹幸緩西園夢還留朔雪悲含情方幾  
日誰道髣髴添絲

向夜月迎人空煙合望新落梅輕去影乳鳥  
乍啼晨碧水涵苔暗流光散露勻良宵仍蘊  
藉悽惻奈何春

十二月八夜看月

寒月靜不迴中天白靄分煙空含樹色星淺  
入冰紋夢覺疑無定淒清受已勤還情誰寄  
託千里一氣氤

初九夜再賦

迢遞緩當天浮光始出弦桂叢含霧隱梅影  
弄霜妍分鏡知誰照寒蟾苦欲僊明珠期有  
贈還恐雪侵年

正月十六夜重賦

丁未

出岫試娟娟光侵落照天昨宵深困雨初夜  
未虧圓透碧融霜氣凝暉欸夕煙梅香來近  
遠稍覺送微暄

與唐須竹夜話

戊申

九春初歇雨花展不相期踏蘚亦何適臨風  
久繫思秋毫分九級火電掣雙肩不與通消  
息含情更待誰

鼎鼎千秋意勞勞夜話傳六經誰楚漢一擊  
試鷹鷂偶覺空羣馬人疑泛月船名心消已  
盡無望古今憐

始晴

春盡試新晴高天起夕清南飛雙鳥白西上  
一星明潤葉  
露涼螢傍紫萍當年未蕭

瑟曾此晚愁輕

湄水月泛同芋巖

泛宅非今日清歡任偶攜  
灘光月影上山色  
晚霞西極目隨移棹生涯試杖藜  
江洲無歲酒還似武陵溪

排律

八月梨花 乙未

夕吹暄風葉初噉炫露條塗陰新紫薦大谷  
早英飄留蝶尋香薄遲鶯憶夢遙迎涼催曉  
色倚雪抗清霄恨詎青春謝姿矜白日昭潔  
統悲漢扇瑤館駐秦簫抱影空含碧凝魂映  
沈寥雲痕將桂栗湘怨亘蘭苗修月飛瓊梯  
凌空舞素潮西烏歌正急南樹夢猶妖瀚海  
寒偏耐哀家韻未饒一桐虛井砌片葉點詩

瓢街去元禽遠歸來白鴈邀餘芳回羯鼓幽  
約後星橋江介蘆花冷揚州玉蘂凋兩情搖  
落日芳信在山椒

新秋看洋山雨過

丙申

南楚秋風日輕陰太白方參差分遠嶂明滅  
互斜陽旋度雲間樹還吹山際香鷺飛初掠  
潤燕語乍矜涼雲斷天逾碧林疎野乍光餘  
霞侵月淺晚霧過溪長薄袂泠泠善閑愁鼎  
鼎忘蕭齋聊隱几吾道在滄浪

山居雜體建除 己亥

建宇依回岫鋤畦沿澗流除雲無過客留易  
伴孤遊滿徑縈霜帶遙天珮月鈞平泉空木  
石之晏自春秋定裡窺僧際醺餘緩宿愁執  
交頤石古送遠野鷗浮破雪尋新草迎晴驗  
午鳩危煙征杳漠細草藉香柔成績錄蜂課  
紛爭笑蟻謀收書衽粉蠹篆壁寫蝸牛閒圃  
蛛絲密支牀龜息幽閉關因物理杜德擬天  
休

哀管生永叙 辛丑

落葉風喧夕啼鴟相冷霜如何悼亡客還有  
喪予傷岳徑雲藏雪洋泉月引涼培蘭將九  
畹鍊鏡已三商帶草先摧綠傳燈獨秉光思  
深千里駕望屬百身良燁燁芝房折悠悠蒿  
里長紫囊悲太傅細帙冷中郎春穀江流遠  
南雲塞路荒人情誰劒挂天道豈弓張交絕  
憐東里狂歌問子桑貢生空委珮鮑叔未分  
糧笛咽山陽館琴殘子敬牀寧知哀九辯不



及待沈湘

愷六種鳳儼花盈畝聊題長句

光風何處好  
越徑啟朝陽  
竹里天凝綠  
梅村月舊黃  
名花拚物玩  
小品眷幽芳  
蕉露分晨潤  
苔茵蔭午涼  
學仙初羽化  
字鳳欲歌狂  
莖脆空清入  
陰圓碧靄張  
欲言鶚味曲  
如舞蝶衿忙  
紫暈飛初日  
華吹結紺霜  
凝丹猩褱血  
淺素雪添香  
不解邢僧尹  
終諧鷗侶皇  
分妍衿色色  
薄袂共洋洋  
蝶臂雖多如  
萬尖得上

粧素輪宜晚拘義甲惜春藏小觸嬌旋怒多  
靈飲亦翔清琴蛇腹古丸藥茲胎康瑞約宜  
男早心同梔子長閑居人自雒至止客懷湘  
相約秋光裡娟娟惜不忘

七言近體

耒陽曹氏江樓遲舊遊不至

戊子

野水搖光上小樓，關河寒色滿樓頭。  
韓城公子椎空折，楚國佳人橘過秋。  
淅淅鴈風吹極浦，鱗鱗楓葉點汀洲。  
霜華夜覆荒城月，獨倚吳鉤賦遠遊。

圓通菴初雨睡起聞朱兼五侍御從平西謁桐城閣老歸病書戲贈

秋井拖陰柳色闌，疎雲開碧整歸鞍。  
梧桐新

墜平津苑鷁鴻遙飛御史灘愁裏關山江北  
杏尊前星漢粵天寒砮杵應盡中原略莫遺  
蒼生屬望難

李廣生自黔陽生還歸闕率爾吟贈前

感洪一龍三陽太僕山公及郎君鄭石

諸逝者浮湘亭之遊

亭在湘鄉漣水西南郭天門司馬建

今燬

漣水東流落月橫浮湘亭上似三生漢庭舊  
節歸華表粵道旌旗亂早鶯酒侶垂楊悲墓

合世情蛺蝶到春驚如君豪氣矜淮海恨到  
消沈淚亦傾

答姚夢峽秀才見東之作兼呈金道隱  
黃門李廣生彭然石二小司馬

遙求勾漏尋靈餌卻背僊壇訪上元初服偶  
朕拋竹籜騷情一倍感芳荃雲畦過雨懷紅  
藥春泛消愁畏綠尊千古英雄無死處酒徒  
高唱感夷門

五日小飲兼五舟中寄人時兩上書件

時相俟譴命故及之

垂垂江上瘴雲飛也聽蓮舟撾鼓歸炎海蛟  
龍吞楚客綠雲煙水弔湘妃故園蒲草空盈  
把過嶺笳聲尙合圍哀歎遠憑清思和目前  
殊覺解人稀

留守相公六表仰同諸公共次方密之  
學士舊韻

千古英雄此赤方灘江南下正湯湯情深北  
闕多艱後興寄東臯信美鄉進酒自吹松枳

曲裁詩恰賦菱荷裳蕭森天放湘纍客得倚  
商歌待羽觴

涼生恰恰桂江天萬里吳皐秋信傳月擬上  
輪分海暈風初過嶺霽蠻煙珣戈數轉三襄  
影花塲憑留七日僊莫訝維州爭論巫河山  
清晏自平泉

石板灘中秋無月奉懷家兄

磧岸清江隔晚煙鱗鱗雲起夕陽天秋聲已  
覺頻喧夜明月心知不易圓桂闌參差疑羽

客蘆中迷離訪澳船  
刀頭飛鏡終無準  
今夕何年倍惘然

讀指南集二首

乙未

絳節生須抱壁還  
降戕誰捧尺封閑  
滄波淮海東流水  
風雨揚州北固山  
鵲血春啼悲蜀易  
鷄鳴夜亂度秦關  
瓊花堂上三生路  
已滴燕臺頸血殷

揚州不死空坑死  
出使臯亭事未央  
鳴鳩春催三月雨  
丹楓秋忍一林霜  
硯門崔嵬留朱



序文水魚書待武陽滄海金椎終寂寞汗青  
猶在淚衣裳

冬盡過劉庶先夜話效時體

端自蓮花瓣裏來幻身真作東蜂猜世如奕  
某輓轡切話到文章婪尾杯山公叔夜龍鬢  
客兀者鄭僑斥鷃才金銷石泐尋常事慙媿  
寒香一逕梅

續哀雨詩四首

辛丑

庚寅冬余作桂山哀雨四詩其時幽困

永福水砦不得南奔臥而絕食者四日  
亡室乃與予謀間道歸楚顧自桂城潰  
陷濡雨六十日不能取道已旦夕作同  
死計矣因苦吟以將南枝之戀誦示亡  
室破涕相勉今茲病中揅讀舊藁又值  
秋杪寒雨無極益增感悼重賦四章余  
之所爲悼亡者十九以此子荆奉倩之  
悲余不任爲亡者亦不任受也

寒煙撲地溼雲飛猶記餘生雪窖歸泥濁水

滾天險道北羅南  
島地危機同心雙骨埋荒  
草有約三春就夕暉  
簷溜漸疎鶉唱急殘燈  
炷落損征衣

晴月嵐平北斗移  
挑燈長話桂山時  
尚雲侵夜偏飛雨  
宿鳥驚寒不揀枝  
天吝孤臣唯一  
死人拚病骨付三尸  
陰晴旦暮尋常極  
努力沿洞秋水澹

半腸虎穴屢經過  
老向孤峯對夢婆  
他日憑收柴市骨  
此生已厭漆園歌  
藤花夜落寒塘

影鴈字雲低野水波  
樾館無人苔砌冷  
桂山相較未愁多

桂山哀雨舊詩留讀  
向泉臺憶得不卞壺  
可容魂大笑王章不  
爲死含愁丹楓到冷  
心元赤黃蘗雖晴命  
亦秋韶月年年春日  
暝倡條冶葉漫當頭

人日

甲辰

人日猶餘寅正臘  
深陰不識月初弦  
春光荏苒虛梅信  
朔雪霏微亂柳煙  
何處暄風催綵

勝誰將病骨祝華年中宵欲待清霜霽珠雨  
還飛玉粟田

又雪同歐子直

溪邊林外轉霏微幾處新鶯禁不飛卽次青  
春欺白髮丁寧酒力試寒威連天朔雪悲明  
月昨日西清憶落暉爲報春光多蘊藉來時  
一倍報芳菲

五日攜攷兒同子直洎賢從哲仲小飲  
分得端字

今年五日尙餘寒剪菰苜風擺露難雨歇單  
魚垂柳徑人歸貰酒白雲端丹心綵筆三湘  
事霜髻朱顏一鏡看彭澤無田供秣米何須  
秬秠飽龍餐

卽事有贈

青門綠野兩情忘柳宅桃津一徑長四海交  
窮憐白髮雙星夜永看珠光梅香早透臙臙  
月酒坐寒侵欸欸霜詠史已驚開竹素挑燈  
無事話滄桑

人日新晴 乙巳

昨宵弦上晴天月人日青開媚景煙柳帶小  
吹搖露顆紅芽纖出破苔錢勝常難問求凰  
意懷舊空吟落鴈篇爲惱新鶯驚午睡不容  
夢蝶駐華年

秋雨同子直

秋陰何來飛雨淙杜陵歎之後堯江井桐已  
落不知數水鳥無愁聊自雙遊展幾曾過柳  
岸青尊只少對蘭缸猶傳錦字開幽獨溼月

穿雲上小牕

又雨

昨日餘暄黃稻天輕雷斜過晚霞邊林光留  
日猶多碧暝色侵雲不耐煙凌藕晚紅欺菡  
萏風光苔色長連錢栖遲薜逕經過少後厭  
溪聲柳外喧

夜

始夜楓林初下葉清秋弦月欲生華涼疑露  
草流螢緩雲斷西峯大火斜藏徑餘生驚也



水迷津天上惘星槎興亡聚散經心地高柳  
蕭森隱荻花

元日過子直奕

今日何年復歲朝曉牕新夢試逍遙韶光流  
轉誰消息春賞殷勤久寂寥竹逕雲深通綠  
靄蘭芽雨沁透紅苗高齋奕散前溪路回望  
炊煙隔小橋

故孝廉李一超以懷貞窮愁死不及有  
嗣息元配林孺人掖呶太孺人于瘳病

中十四年不舍楊右粹邁危疾臨終悲  
咽以不得躬親大事爲憾啼聲未絕而  
逝余于一超不淺視道路感泣者目逾  
涯量裁二詩以將哀尤爲太孺人愍悼  
焉

懷清臺上望孤忠剩水餘山恨儘同塊肉無  
留猶趙氏炊煙不熱自梁鴻亭亭寶婺邀殘  
月轉轉金輪御朔風十四年來千種事淒涼  
彤管不書功

從知生死一浮漚大誓弘深不易酬萱草幸  
留春百歲桂輪難滿月三秋鷄聲五夜聞遺  
語鶴髮千梳縮別愁猶有寒薺青半畝留調  
膏粥侍晨羞

劉若啟爲余兄弟排難已招泛虎塘叙  
其家乘會當六表悅辰歡譖之下遂允  
貺室子散兒

此生相聚太從容海徙山移夢後逢急難情  
淡增繳緩根株心許葛羅封百年初識團圞

相雙徑從看偃蓋松癡煮丹砂回白首年年  
吹笛上嵩峯

湖外遙懷夢翁

心心長不斷湖元滿月孤星舊有緣壁燒三  
叉餘幸草湘流九回惘膠船寒淡鶴帶堯年  
雪海濶龍分佛口涎聞說當機唯一指皈心  
欲扣逆流舷

寄懷青原藥翁

霜原寸草不留心一線高秋入桂林哭笑雙

遮々字眼宮商選絕斷紋琴情知死地非長  
夜屢卜游魂得返吟唯有尋思歸計好黃金  
裝額惜春淡

春日山居戲效松林體六首 戊申

垂垂雨足曉雷收草閣憑崖似倚樓工赤數  
鶯吹幾疊之玄一瀑寫雙鉤雲生右史蟬餐  
潤花墜中丞蟻渡幽已過清明瓜未種憎人  
相擬到秦侯

小牕日卯破清酣漸老簾幃上午嵐梵夾偶

披唯以八丹圖橫看亦函三西峯月瓦從飄  
練曲徑苔裯穩臥蠶千畝琅玕溪漲外經旬  
玉版不曾參

卽葉無多染沁泥危橋不渡只前溪楊花甲  
坼占風北鸚鵡丁寧喚日西漏白蘋開十字  
眼踏青蘅試五花蹄行滕還惹空青溼篝火  
鑪邊恰煮藜

天桃十樹柳千條咀雨迎晴意兩消活影玻  
黎沈曲沼吹香韎鞢綵平橋游龍依蘚紅鱗

密魚虎分波翠暈搖莫厭溪聲喧午夢乘流  
初好泛詩瓢

薺美先登識歲饒回塘及暝浸長腰圓餚朝  
雪春猶耳甌甕盒香糝鼈苗帶雨饒妻簪躑  
躑催耕搏黍啄螟螣高齋寓目忘天嶼黃犢  
將塲上小橋

垂楊護徑轉依依綠揜芋眠不置扉繭室擬  
營桑葉少蠲書欲就柿林稀閑栽生芣蒸寒  
藥擬架番松卻暑威新韭半畦鍾乳長無妨

覽鏡說新肥

期徐蔚子虎塘遲至余暑病先歸蔚子  
獨留萬綠池與若版月飲共相太息寄  
此謝之

稻花風轉接羅吹繫轡蕭條古檜枝  
画扇紅牙前夕酒青山白雪幾年詩  
千秋華表留僊語一曲滄浪鼓棹悲  
爲惜君愁須緩緩相逢知有淚雙垂

答黃度長



東籬花冷候蟲驚  
濱水連湘一鴈征  
霜色已凋隋岸柳  
秋風還憶武昌城  
傳經魯壁聞絃竹  
述酒柴桑訪秫秔  
心迹元同難舉似  
雲飛葉落雨含情

得青原書

青原題書寄南岳  
經年霜雪中回還  
夕陽秋雨各津溪  
易道別峯許躋攀  
西臺江水流清泚  
東林蒲菡開嫋嫋  
春鴻社燕皆旦夕  
不擬幽憂長閉關

五言絕句

滇峽謠五首

戊子

彈子磯空時翻風燕不迷朝天臺已築何處  
着丸泥

彈子磯

煙水凝眸遠蘼蕪且着花章臺扳折後依舊

屬韓家

望夫江

蒼壁空青破清江拂翠開越王虛勝槩留待  
佛東來

觀音巖

辛苦滇江水晨潮接暮潮飛來金碧影劫火

不會燒

飛來寺

故山元有主  
新寵詎難忘  
猶恐孫郎妬  
相邀弄夕陽  
歸猿洞

秦王卷衣

渭南宮草綠  
上殿帶香歸  
識得邯鄲美  
叢臺舊舞衣

長干曲

秦淮通北固  
流月帶潮來  
郎今渡京口  
日暮使人猜

白魚騶

柳絮隨簷帽香泥污馬鞵春光無賴甚誰與  
醉芳年

江南曲

自有三臺曲齊拋八寶簪可憐秋色裏獨唱  
望江南

爲晉寧諸子說春秋口占自笑

腹借征南庫燈邀漢壽光傷心難自遣開卷  
是春王

蠹死墨魂失鵲飢遠視仍紙牕鑽不透大抵  
是癡蠅

南岳經聲苦東林睂宇嚙似他添強笑猶恐  
隔鄰嘆

焚澤弘演肝伊川辛有淚未知家則堂云何  
宣此義

春盡從子儼寄山居雪咏絕句歛爾隔  
歲聊復和之

丙申

春去天涯雨南留客影單梁園裁賦好遙送

杏花寒

殘雪留雙髻餘寒抱死灰君還愁歲暮不畏  
老夫猜

痛

阿旁嚴霜殺人髻刺日千十年  
些盡

噦

河間酒壚前常愁歡見絕絮殺采桑人同心  
若爲結

顫

白刃甜如蜜清流險似波  
半牢須壁立臧穀較無多

寒

借書敗蕉葉索字黃菅梗  
一倍粟生肌霜衾未恁冷

熱

眞作寒灰好禁他冷竈頭  
燒燈圍傀儡鮑老汗珠流

養

汗蝨亦我液疥蟲亦我肌  
喉間衝敗絮鼻爪復奚爲

哭

背我堂堂太隨他  
昔昔來無情猶有恨  
獨上望春臺

笑

牛溲持作酥  
渴分犢子飯  
客作不得嘗  
垂頭打悶顛



山居雜體吃口詩

晴卽弄岫獲峯分方未返路亂籠綠蘿雲暈  
漏愈遠

口字詩

岳路臨磊砢高橋管觀晴蟬語歛囁啁鷗侶  
歡漚藻

爲宋子主人送高漸離入秦

每見關中客無心理筑哀徵書昨夜到不待  
曙光催

絕句三首

乍暝回亭午雲生葉葉低輕雲將雨足侵入  
夕陽西

弱柳垂新潤春風欵欵中穀波飄一响綠影  
過池東

轉轉春條緩鱗鱗野水肥疎雲飄雨白繚繞  
鷺絲飛

詠百合 丙午

蓮瓣濃含粉葯房素養胎繇來千種束不放

寸心開

結襪子

初識張公子投瓊氣已橫匣中報恩劍不爲  
汝曹鳴

六言

詠史二十七首

箕子生傳洪範劉歆死擊穀梁叛父祗求媚  
莽稱天原是存商

墮淚曲江秋燕白頭小范黃花變雅三年破  
斧續騷一部懷沙

桎梏荀卿性惡逍遙王衍無爲指鹿不迷物  
則問蛙方證希夷

安世不藏父惡南軒盡擗前羞遷史直承堯

典紫陽曲學春秋

堯典不爲禹諱  
春秋爲親者諱

公主盤殮賭命上卿片唾輪頭偏是羈孤臣  
妾貪他菌蟪春秋

中壘傳經燒汞東坡抗疏逃禪夢倚昌黎牀  
榻鑪兼畢萬銅鉛

信陵飲酒近內步兵迭路驅車贏得不知別  
苦難忘聊復愁予

田豐死爭官渡鴟夷不諫夫椒未到水窮山  
盡難迴墜石狂潮

鳳杏楊雄拾羽龍乖谷永探鱗奇字吟癡萬  
卷危言賣綻千春

元載飢寒掃迹蘇秦車騎迎門暴馬裝妻勾  
當髑髏血肉乾坤

李勣逢人便殺西巴見鹿猶憐自讓孟孫眼  
孔何須武墨金錢

泚水離城垓下■倉子午褒斜先手偏爭後  
着一羊不奈三義

曹魏登壇舜禹蕭梁塔廟瞿曇酸得不禁太

苦悟來妙在無慙

代契丹僧延廣爲司馬愛譙周一綫容頭活  
計三毛肉袒風流

宵死魔留佛種再來鷹化鳩啼借問邦昌僞  
相何如任永淫妻

方寸止知老母始終唯報韓王家鶯儘供玉  
饌么禽長寄雕梁

魏纂陳思墮淚晉王謝客揮戈奪嫡封侯願  
力頑民義士風波

孝逸粧臺授鉞崔生穹帳修文臨鏡妖狐國  
史護關鸚鵡將軍

郗鑒生憐逆子沈充死愧賢孫桂蠹何傷芳  
樹蘭芽不染滌根

着面維州黑子還魂免役青峽皮砌只爭燐  
揅頭傾忘却支吾

狄青非萬人敵韋臯亦百里才學擊鷹鷂誇  
俊知音黃雀生災

子厚縣崖題壁昌黎華岳投書小人可使有



勇君子其蔽也愚

擒守忠如捉鼉奉嘉王亦建瓴流汗帆風搖  
鰲埋頭白晝囊螢

習氣齊丘說化門頭唐主叅禪圓頂方袍天  
子黃扉紫閣神僊

家法銷兵杯酒鼉章決獄風波無信人言采  
苦其則不遠伐柯

蟋蟀消歸秋窰鸚鵡生受思陵殘隊吟蟲語  
鳥一抔秋草冬青

乍可黃冠歸宋羞將白血殉元蜜檠不爭甜  
苦損蟲各有精魂

七言絕句

河田營中夜望

戊子

夜燒連山接暮雲  
牙旌高捲管絃聞  
負恩自笑夷門客  
魂斷邯鄲晉鄙軍

桂林偶怨

靈藥成虛舊恨空  
征衣無那棟花風  
緜緜春雨垂簾下  
又向天涯識塞鴻

自南岳理殘書  
西歸慈侍困于土人始  
濱不免太孺人  
但慙廢食旣脫論令去

此有作聊呈家兄

春露慈竹惜徘徊孤鶯孤飛鴈隼猜莫是漁  
郎歸棹錯桃花不爲避秦開

題彭然石舫壁

舊曾相識此扁舟江黑雲低對戍樓象帝祠  
前秋似葉伏波山下月如鉤

偶聞自遣

鷄聲殘月夜如何冰級危輪又一過扯斷藕  
絲無住處彌天元不冒修羅

過涉園問季林疾遣作早梅詩四首

雨輕偶破山雲出花淺時聞小徑香總是和  
煙開不徹儘教無月也昏黃

晚香消盡寒香接無日無花不早開莫倚文  
殊能問病現身天女出簷來

江南塞北總闌珊幽谷嫣然一破顏無數明  
璣垂屋角牽蘿何必賣珠還

先機買隱君能早後着投生我自癡也共巡  
簷吟不了耐他冷藥共疎枝

過西明寺望早冲追懷悟一上人示蒼

枝慈智

壬辰

縹渺諸天縞雪飛鑪煙初焙溼雲衣重來春  
水迷蒼翠淒絕蘇圍画板歸

冬葵滑熟菠薐脆雲子抄香鳳乳花慙媿千  
金無報處三生客在自蒸砂

從子牧遘閔以後與予共命而活者七  
年頃予竄身徇中不自以必生爲謀救  
固留待伯兄時序未改避伏失據掠騎

集其四維方間道往迎已罹鞠凶矣悲  
激之下時有哀吟草遽佚落僅存絕句

四首

甲午

斜日荒荒打棗天山頭回首杳墟烟當時不  
道今生別猶向金風淚黥然

黑海難全一葉舟誰將完卵望傷鵬含羞含  
恨無終極稚子牽衣笑鄧攸

割骨分腸亦屢禁如今萬矢倍攢心岳旰秋  
草應含怨萬樹嚴霜殺一林

情根悔不早鋤苗蔓草繁絲自惹愁止竟潘  
安悲白首人間何有墜珠樓

哭歐陽三弟叔敬沈湘

丙申

菖雨蘋風杜若香懷沙千古弔瀟湘遲回怕  
唱招魂曲不信人間別已長

通眉舊是玉樓僊昌谷春消野竹煙誓到奚  
囊傳好句人間差有外兄賢

荆榛小徑對春溪月上芭蕉碧影迷池館山  
陽留不得愁來唯伴野猿啼



枯木難消六賦心散愁長欲寄知音調孤雌  
霓休文句哭碑靈牀子敬鑒

鞭香洒血氣奔雷采葛歌殘擊筑哀十四年  
來爭一死英雄消受野棠開

南榮枝葉各相當拖玉揮金意共長岸谷消  
沈羊叔子推恩無分到中郎

小步

新缸釀暝帶餘清雲裏東峯一曲晴步步看  
花兼看葉胎紅乳白各分明

吟得

雙溪欲合聲逾急，孤鳥將栖晚更飛。  
唯有小窗人睡起，不知香盡落春衣。

折楊柳

見家門前楊柳枝，南來北往折殘時。  
去去青驄都不返，郎行莫再挽青絲。

明妃曲

金殿歲時鎖漢宮，單于談笑借春風。  
黃沙已作無歸路，猶願君王斬画工。

南嶽摘茶詞十首 己亥

溪山三月雪花飛折筍禁桃乳雀飢昨日剛  
傳過穀雨紫茸的的賽春肥

溼雲不起萬峯連雲裏聞他笑語喧一似洞  
庭煙月夜南湖北浦釣魚船

晴雲不采意如何帶雨掠雲摘倍多一色石  
薑葉笠子不須綠箬襯青蓑

一搶纔展二旗斜萬族綠沈間五花莫道風  
塵飛不到勒尖隊隊滿州靴

瓊尖新炕鳳毛毳玉版兼蒸龍子胎新化客  
遲六尚遠明朝相起公城來

小築團瓢乞食頻鄰僧勸典半畦春償他監  
寺幫官買剩取飾餘簷兩塵

丁字牀平一足雄踏雲穩坐似凌空商羊能  
舞晴天雨底用勞勞百脚蟲

清梵木魚暫放鬆團團鋸齒綠陰濃揉香撥  
翠三更後剛打烏啼半夜鐘

山下秧爭韭葉長山中茶賽馬蘭香逐隊上

山收晚茗棄他布穀爲人忙

沙彌新學唱皈依板眼初清錯字稀貪聽姨  
姨採茶曲家雞又逐野鳬飛

初度口占

橫風斜雨掠荒丘十五年來老楚囚垂死病  
中魂一縷迷離唯記漢家秋

一萬五千三百三愁絲日日縛春蠶天涯地  
窟知音絕新剪牛衣對雨談

十一年前一死遲臣忠婦節兩參差北枝落

盡南枝老，辜負催歸有子規。

新買茱萸半畝堂，苔侵牀足月侵牆。天涯芳草迷歸路，病葉還禁一夜霜。

十載每添新鬼六，淚如江水亦乾流。青髭無伴難除雪，白帽多情苦戀頭。

陳搏驢背笑難禁，龔勝牀頭餓稱心。雪攪九微香，炬暗未知除夕是晴陰。

竹枝詞十首

丁未

楊廉夫唱竹枝于湖上，和者麇集以和。

體求之非竹枝也長慶始製同出而岐  
分如竹枝之相亞應篙楫之度登頓劉  
滴用近藏遠庶幾風人之旨故聊爲之  
嫩鶻鶻鬪不相降野鴛鴦飛不作雙昔年挑  
冰上雪嶺今年販水下長江

暮雨朝雲神女峯三朝三暮黃牛踪入峽來  
回看不厭出峽對面不相逢

巫山不高瞿塘高鐵錨不牢火杖牢妾意似  
冰冰滴凍郎心如月月生毛

洞庭湖北漢水橫青草湖南湘水清兩道湖  
光爭潋灩兩般艇子各分明

黃陵廟前斑竹叢巴丘湖上水連空生受鷓  
鴒啼夜雨生成江兔拜秋風

鷓鴣銜魚只道饑鷓鴣運目也孤飛江花笑  
水郎不忒白浪掀天郎不歸

荷花有日綻金鬚荷葉無心繫水珠浪打萍  
開從惱妾萍留浪忒恰憐渠

江邊寒梅自着花江上女兒自闌茶浪向花



前焚片腦凝疑茶裏點脂麻

楊柳灣頭賊舸開楊花飛雪逐船來郎愛楊  
花隨舵轉儂憐楊柳倒根栽

巫山欲出三峽中狼山還隔海門東何人不  
打開船鼓何人解使鬪帆風

忍俊

金鷄只遣報青蠅發篋探丸等不應東海未  
虧輪一粒無妨郭索與橫行

鰓眼紅如鯉尾紅吹沙蝕岸儘春風任公無

用鈎絳處畢竟魚還死水中

臘月桃花帶雪妍迎頭早唱賣花喧若教除  
取春千日借問姚黃得幾錢

豸祭羔豚獮祭鮮不須欣享且爭妍王唐瞿  
薛當年盛又東潘妃步步蓮

波斯匿王不自知恒河未改雪飄眉流沙瀾  
瀾魚鰕少惆悵灘頭立鷺鷥

勾芒跣足苦爭先昨夜酸風雪滿天不見旗  
亭游冶客春歸纔着土牛鞭

苦爲侯城惜道窮姚師閑淚洒秋風  
蟬吟若續讀書種上計偷香是賈充

悟盡人間得未曾食輪先轉法輪僧  
莫將負鼎嗤伊尹草具匆匆殺范增

五色雲中鸞鵲衣鳳凰池上帶香歸  
并刀剪落金風裏乞與誰家作舞衣